



*Hoërskool Swartland*



*Hoërskool Swartland  
HIV / VIGS  
beleid*

*Opgestel deur Beheerliggaam*

*P Bester*  
-----  
P Bester  
Voorsitter

*AJ Schoonraad*  
-----  
AJ Schoonraad  
Skoolhoof

Datum: 09/01/2019

## HIV/ VIGS BELEID

Hierdie beleid oor MIV/VIGS voldoen aan internasionale standaarde oor MIV/VIGS in skole en die vereistes wat onderwyswetgewing in die verband stel. Die grondwetlike regte van die individu word gewaarborg, naamlik:

- a. die reg tot basiese onderrig;
- b. die reg om nie teen gediskrimineer te word nie;
- c. die reg op lewe en liggaamlike integriteit;
- d. die reg op privaatheid;
- e. die reg op toegang tot inligting;
- f. die reg op vryheid van denke, godsdienstvryheid, vryheid van geloof en uitdrukking;
- g. die reg op vryheid van assosiasie;
- h. die reg op 'n veilige omgewing.

Nademaal Hoërskool Swartland daarna strewende om die belange van die kind te beskerm sal die volgende beleid die beleid wees oor MIV/VIGS in die skool.

### 1. DEFINISIES

**MIV:** Beteken Menslike Immunitetstekort Virus.

**VIGS:** Beteken Verworwe Immunitetstekort Sindroom. Dit is die finale stadium van die MIV infeksie.

**Onredelike diskriminasie:** Beteken regstreekse of nie-regstreekse onredelike diskriminasie teenoor 'n persoon op een of meer aspekte van die Grondwet van die Republiek van Suid-Afrika, 1996 (No.108 van 1996)

**Universele voorsorgmaatreëls:** Dit is die konsep wat internasionaal bekend is in die MIV/VIGS konteks wat gestandaardiseerde voorsorgmaatreëls aandui met die doel om die verspreiding van MIV/VIGS van persoon tot persoon te bekamp. Dit sluit die higiëniese voorsorgmaatreëls en die gebruik van rubberhandskoene in.

### 2. SKOOLPERSEEL

2.1 Daar bestaan geen kennis van gevalle waar die oordraging van MIV/VIGS op die skoolterrein of in die skoolomgewing plaasgevind het in die toevallige kontak tussen persone nie.

2.2 MIV/VIGS kan nie deur die dag tot dag sosiale kontak tussen mense oorgedra word nie. Die virus word slegs oorgedra deur bloed, semen, vaginale vloeistof en moedersmelk. Alhoewel die virus ook alreeds geïdentifiseer is in ander liggaamsvloeistowwe soos speog en urien, bestaan daar geen wetenskaplike bewysgronde dat die virus deur dié vloeistowwe oorgedra kan word nie.

2.3 Leerders en opvoeders met MIV/VIGS sal al hoe meer deel vorm van die skoolsisteem as gevolg van die verhoogde voorkoms van die MIV/VIGS infeksie.

2.4 As gevolg van die aard van MIV/VIGS anti-liggaampie toetsing en die "vensterperiode" wat voorkom tussen besmetting en die begin van ernstige simptome, is dit nie moontlik om te bepaal wie MIV/VIGS het en wie nie, al sou die toelatingsbeleid 'n MIV/VIGS toets verpligtend maak by skooltoelating.

2.5 Toetsing vir die voorkoms van MIV/VIGS en die uitsluiting van diegene met MIV/VIGS word nie beskou as 'n haalbare metode om die skoolomgewing MIV/VIGS-vrye gebied te maak nie.

2.6 Die verpligte openbaarmaking van 'n leerder se MIV/VIGS status aan die skoolowerheid by skooltoelating word nie as 'n uitweg gesien nie, omdat dit geen betekenisvolle doel sal dien nie. Dit is egter enige ouer se reg om sulke inligting vrywillig bekend te maak. Die ware openbaarmaking van 'n leerder se MIV/VIGS status aan die skool moet verwelkom word en die skoolomgewing moet so ontwikkel word dat die tipe van inligting konfidensieel sal bly en dat daar nie plek sal wees vir onregmatige diskriminasie nie.

2.7 Leerders en opvoeders met MIV/VIGS moet toegelaat word tot volle deelname aan die skoolprogram volgens hulle vermoë en mag nie die geleentheid ontsê word tot goeie onderrig nie. Net so moet opvoeders wat MIV/VIGS onder lede het toegelaat word om 'n vol professionele lewe uit te leef en behoort dieselfde regte en geleenthede te geniet as ander opvoeders sonder MIV/VIGS. Geen diskriminasie van enige aard mag teen die opvoeders met MIV/VIGS uitgeoefen word nie. Die infeksie wat hulle onder lede het, hou nie direk 'n gevaar in vir ander binne die skoolomgewing nie. Met die nodige voorsorgmaatreëls in plek behoort daar nie 'n probleem te ontstaan nie.

2.8 Die onbeduidende risiko van MIV/VIGS besmetting binne die skoolomgewing kan effektief uitgeskakel word deur die volgende standaard infeksie beheermaatreëls, ook bekend as universele voorkomingsmaatreëls en goeie higiëniese beginsels onder alle omstandighede. Dit sal impliseer dat in situasies van moontlike blootstelling aan die virus soos in die behandeling van oop wonde, hulp by ongelukke of beserings op die skoolterrein of ander vorme van blootstelling aan bloed, alle persone as potensiële MIV/VIGS lyers gesien moet word en dat hulle bloed en liggaamsvloeistowwe as sulks hanteer moet word.

2.8.1 Huidige wetenskaplike bevindinge stel die risiko van die oordrag van MIV/VIGS virus tydens onderrig, sport of speel aktiwiteite as minimaal. Daar bestaan nie 'n gevaar van die oordrag van die virus deur spoeg, sweet, tranes, urien, asemhalingsvog, handskud, swem, water, gemeenskaplike badwater, toiletgebruik, kos of drinkwater nie. Die stelling oor die minimale risiko tydens normale skoolaktiwiteite is alleen waar as die nodige universele voorsorgmaatreëls nagekom is. Voldoende beskerming tydens wondbehandeling moet in alle gevalle toegepas word. Bloeiende wonde moet veral versigtig hanteer word. Kontak sportsoorte soos boks en rugby kan waarskynlik 'n hoër besmettingsrisiko inhou as ander sportsoorte waar daar minder fisiese kontak plaasvind en die risiko van besmetting baie laag is.

2.8.2 Die konstitusionele reg van alle leerders en opvoeders moet beskerm word op 'n gelyke basis. As dit daarom gevind word dat een persoon vir ander persone by die skool die gevaar inhou van die moontlike besmetting met MIV/VIGS, dan moet die nodige maatreëls getref word om die ander persone te beskerm teen die gevaar van die moontlike besmetting met MIV/VIGS. Medies erkende gesondheidsrisiko's rakende MIV/VIGS vir ander mense sluit die teenwoordigheid van aansteeklike siektetoestande in, asook onbeheerbare bloeding, moeilik behandelbare wonde en aggressiewe

seksuele gedrag. Leerders met aansteeklike siektes soos masels, Duitse masels, waterpokkies, kinkhoes en pampoentjies behoort nie die skool by te woon nie om al die ander leerders van die skool te beskerm teen moontlike infeksie, spesiaal daardie leerders wie se immuunsisteme moontlik deur die MIV/VIGS virus aangetas is. Die skool behoort ouers ook in te lig oor immunisering.

2.8.3 Leerders moet in Lewensoriëntering onderrig ontvang oor MIV/VIGS. Die onderrig behoort op 'n deurlopende basis te geskied en moet nie as 'n geïsoleerde eenheid aangebied word nie, maar behoort so aangebied te word dat die feite wetenskaplik korrek en verstaanbaar aan die leerders oorgedra word.

2.9. Die doel met onderrig oor MIV/VIGS is om die verspreiding van die virusinfeksie te voorkom, om onnodige vrese oor die epidemie te weerlê en om die stigma wat aan die siekte kleef op te hef. Daar moet ook gepoog word om die leerders so te beïnvloed dat hulle nie onnodig diskrimineer teen persone met MIV/VIGS nie. MIV/VIGS onderrig moet verseker dat leerders die regte inligting en kennis ontvang vir hulle ouderdomsgroep om behoorlike gedrag aan te leer om hulself teen die MIV/VIGS epidemie te beskerm.

### **3. NIE-DISKRIMINASIE EN GELYKVORMIGHEID VIR LEERDERS EN OPVOEDERS MET MIV/VIGS**

3.1 Daar mag nie teen enige leerder of opvoeder gediskrimineer word wat MIV/VIGS of moontlik MIV/VIGS onder lede het nie.

3.2 Leerders en opvoeders met MIV/VIGS moet regverdig en menslik behandel word in 'n vriendelike omgewing.

3.3 Enige spesiale reëlings in verband met leerders of opvoeders wat aan MIV/VIGS lei moet regverdig en menslik wees en moet uit 'n mediese oogpunt geregverdig kan word. Alle optrede in die verband moet tot die skool as instelling se beste voordeel wees, asook tot die voordeel van die persone wat aan MIV/VIGS ly asook diegene wat nie aan MIV/VIGS ly nie.

### **4. MIV/VIGS TOETSING EN DIE TOELATING VAN LEERDERS TOT DIE SKOOL EN DIE AANSTELLING VAN PERSONEEL**

4.1 Geen leerder mag toegang geweier word tot die skool as inrigting of verdere bywoning van die skool geweier word op grond van sy/haar MIV/VIGS status of MIV/VIGS 4 status nie. Hulle behoeftes moet sover as wat dit redelik moontlik is binne die skoolomgewing geakkommodeer word. Enige spesiale maatreëls wat getref word, moet billik en medies verantwoordbaar wees en moet in konsultasie met die leerders en die ouers geneem word.

4.2 Geen opvoeder mag die reg ontsê word om te onderrig of bevorder te word as gevolg van sy/haar MIV/VIGS status of veronderstelde MIV/VIGS status nie. MIV/VIGS mag nie die rede wees vir die ontslag van 'n opvoeder, of die weiering om 'n dienskontrak met die voornemende opvoeder te sluit of om so 'n dienskontrak te kontinueer of om die dienskontrak te hernu nie.

4.3 Daar bestaan geen mediese of wetenskaplike regverdiging vir die beginsel om leerders of opvoeders op 'n gereelde basis te toets vir MIV/VIGS nie. Die toets van leerders vir MIV/VIGS is verbode. Die toets van opvoeders as 'n voorwaarde vir aanstelling of vir die voortsetting van 'n dienskontrak is ook verbode. Indien personeel die wens uitspreek om getoets te word, sal hulle ondersteun word deur die versekering dat die versoek om getoets te word, sowel as die uitslae, vertroulik sal wees en indien benodig sal sodanige lid verwys word na geskikte sentrum vir die nodige berading.

## **5. BYWONING VAN DIE SKOOL OF INRIGTING DEUR LEERDERS MET MIV/VIGS**

5.1 Die behoefte van leerders met MIV/VIGS aan onderrig moet sover dit hulle reg is geakkommodeer word in die skool as dit vir die skool redelikerwys prakties moontlik is.

5.2 Dit word van leerders met MIV/VIGS verwag om klasse by te woon in lyn met die wetsregtelike vereistes van die skool solank as wat dit vir die leerders met MIV/VIGS fisies moontlik is om die klasse by te woon. Hulle teenwoordigheid by die skool mag egter nie 'n ernstige gesondheidsrisiko vir die res van die skoolgemeenskap inhou nie.

5.3 As en wanneer die leerders met MIV/VIGS onbevoeg gemaak word deur die siekte om die klasse van die skool by te woon, moet die skool die akademiese werk aan hulle beskikbaar stel om tuis te doen. Ook wanneer hulle mediese toestand sodoende versleg dat dit 'n gesondheidsrisiko vir die res van die skool inhou, moet die skool die akademiese werk aan hulle beskikbaar stel sodat hulle ouers hulle tuis kan onderrig in gevolge artikel 51 van die Suid-Afrikaanse Skolewet, Wet nommer 84 van 1996.

5.4 Leerders wat nie op dié wyse geakkommodeer kan word nie of wat ernstige MIV/VIGS simptome/gedragsafwykings of neurologiese probleme ontwikkel moet in spesiale residensiële inrigtings vir leerders met spesiale onderwys behoeftes gehuisves word.

## **6. OPENBAARMAKING VAN MIV/VIGS VERWANTE INLIGTING EN VERTROUOLIKHEID**

6.1 Geen leerder (of ouer as verteenwoordiger van die leerder) of opvoeder is verplig om enige inligting openbaar te maak oor die MIV/VIGS status van 'n leerder aan die skool as inrigting of as werkgewer, wat ookal die geval.

6.2 Dit mag in die beste belang van 'n leerder wees as sy/haar MIV/VIGS status bekend gemaak word aan die leerder se opvoeder deur die leerder self (indien bo 14 jarige ouderdom) of deur die leerder se ouer(s).

6.3 Enige persoon wat vertroulike inligting ontvang het oor die MIV/VIGS status van 'n ander persoon moet die inligting konfidensieel hou.

6.4 Openbaarmaking van die vertroulike inligting aan 'n derde party mag gebeur as die leerder (indien bo 14 jarige ouderdom) verkies om dit self te doen, of deur sy ouers of skriftelik deur die opvoeder wat oor die inligting beskik. Die openbaarmaking van die inligting kan ook geskied deur wetlike of geregtelike prosesse.

## 7. 'N VEILIGE SKOOLOMGEWING EN VOORKOMING VAN MIV-OORDRAG

7.1 Alle skole moet universele voorkomingsmaatreëls instel om die risiko van besmetting of oordraging van MIV/VIGS effektief te elimineer sodat die siekte nie kan ontstaan binne die skoolomgewing nie.

7.1.1 Die basis vir die aanbeveling van die konsekwente toepassing van universele voorkomingsmaatreëls lê gesetel in die aanvaarding dat alle persone op die skoolterrein moontlik potensiële draers is van die MIV/VIGS virus is, dat alle bloed, uitskeidings en liggaamsvloeistowwe besmet is en aldus so hanteer moet word.

7.1.1.1. Bloed, veral waar groot hoeveelhede voorkom soos by neusbloei, moet veral baie versigtig hanteer word.

7.1.1.2. Vel wat toevallig met bloed in aanraking was, moet dadelik deeglik met water en ontsmettingsmiddel gewas word.

7.1.1.3. Alle bloeiende wonde, sere, snye in die vel, weefselwonde en oop wonde moet verkieslik onmiddellik gereinig word met 'n geskikte ontsmettingsmiddel soos hipochloried (byvoorbeeld bleikmiddel of Milton), 2% gluteraldehide, organiese jodium of 70% alkohol (byvoorbeeld etiel alkohol of isopropyl alkohol).

7.1.1.4. As daar 'n byt of krapwond bestaan, moet die wond vinnig gewas word met water en ontsmettingsmiddel.

7.1.1.5. Bloed spatsels aan die gesig (mukus membrane of oë, neus of mond) moet dadelik onder lopende water vir ten minste drie minute afgewas word.

7.1.2 Alle bloeiende wonde, sere, snye in die vel, weefselwonde en oop wonde moet verkieslik onmiddellik met 'n nie-poreuse of waterdigte bedekking verbind word sodat die blootstelling aan die bloed geminimaliseer kan word.

7.1.3 Die afwas en reiniging van enige wond moet altyd onder lopende water gedoen word en nie in 'n houer met water nie. As lopende kraanwater nie beskikbaar is nie moet water vanuit 'n houer op die wond gegooi word om die area skoon te maak.

7.1.4 Alle persone wat gemoeid is met die versorging van bloeiende wonde, oop wonde, sere, snye in die vel, weefselwonde, oop vel wonde, liggaamsvloeistowwe of liggaamsuitskeidings moet beskermende rubberhandskoene dra om die risiko van infeksie uit te skakel. Noodbehandeling mag egter nie geweier word omdat daar nie rubberhandskoene beskikbaar is nie. Bloeding kan gestop word met kompressie wat van materiaal gemaak is wat bloed maklik kan absorbeer as rubberhandskoene nie beskikbaar is nie.

7.1.5 As bloed 'n oppervlakte besmet het, dan moet die oppervlakte gewas word met vars bleikmiddel. Die persoon wat dit doen moet beskermende handskoene dra. Alle ander besmettings moet op dieselfde wyse hanteer word.

7.1.6 Bloedbesmeerde artikels moet in plastiek verseël word en verbrand word deur 'n firma wat beskik oor die geriewe.

7.1.7 As instrumente besmet geraak het met bloed of ander liggaamsvloeistowwe, dan moet sulke instrumente in 'n sterk oplossing van bleikmiddel geplaas word vir ten minste een uur waarna die instrumente behoorlik afgedroog moet word vir hergebruik.

7.2 Skole moet verkieslik twee stalle noodhulptoerusting hê wat die volgende behoort te bevat:

7.2.1 twee groot en twee medium pare weggoibare rubberhandskoene;

7.2.2 twee groot en twee medium pare huishoudelike rubberhandskoene vir die hantering van enige bloedbevlekte afvalmateriaal na die tyd.

7.2.3 Absorberende materiaal, waterdigte pleister, ontsmettingsmiddel soos hipochloried, skêre, katoen watte, verband materiaal, gaasverband, sneesdoekies, waterhouers en 'n mond-tot-mond asemhalingstoestel wat aangewend kan word sonder dat daar kontak met enige liggaamsvloeistowwe is.

7.3 Universele voorkomingsmaatreëls is in essensie maatreëls om te voorkom dat daar kontak is met bloed of enige ander liggaamsvloeistowwe. Ander eenvoudiger maniere bestaan ook soos beskryf in 7.2, soos

7.3.1 heel plastieksakke buite of binnemuurs as rubberhandskoene nie beskikbaar is nie; en

7.3.2 gewone huishoudelike bleikmiddel as ontsmettingsmiddel verdun met nege dele water wanneer benodig.

7.4 Elke klaskamer moet beskik oor een paar rubberhandskoene.

7.5 Rubberhandskoene behoort ook by elke sportgeleentheid beskikbaar te wees.

7.6 Noodhulptoerusting behoort oral op die skoolterrein beskikbaar te wees.

7.7 Gebruikte items moet hanteer word soos beskryf in 7.1.6 en 7.1.7.

7.8 Die inhoud van noodhulpkassies moet gereeld deur die verantwoordelike personeellede nagegaan word om te verseker dat die korrekte middele in noodsituasies beskikbaar is.

7.9 'n Volledig toegeruste noodhulpstel moet beskikbaar wees by alle skoolgebeure soos sportbyeenkomste, toere, uitstappies of enige ander gebeurtenis waar leerders betrokke is.

7.10 Alle leerders, opvoeders, ander personeellede en afrigters moet beskik oor die nodige kennis oor MIV/VIGS oordraging, die aanwend van die universele voorkomingsmaatreëls en moet die belangrikheid besef om aan die maatreëls gehoorsaam te wees.

## **8. ONDERRIG OOR MIV/VIGS**

8.1 'n Volgehoue MIV/VIGS onderrigprogram moet geïmplementeer word in die skool vir alle leerders van die skool, opvoeders en alle ander personeellede.

8.2 Ouderdomsverwante onderrig oor MIV/VIGS moet deel vorm van die skool se kurrikulum vir alle leerders en moet ook geïntegreer word in Lewensoriëntering onderrig. Die program moet die volgende insluit:

8.2.1 verskaf inligting oor MIV/VIGS in Suid-Afrika en die ontwikkeling van lewensvaardighede om die siekte te voorkom;

8.2.2 aanleer van eerstehulp beginsels van 'n jong ouderdom af en hoe om met bloeding te werk te gaan;

8.2.3 beklemtoning van die rol van dwelmmiddels, seksuele wangedrag en die rol van gewelddadigheid in die verspreiding van MIV/VIGS;

8.2.4 aanmoediging van leerders om gebruik te maak van gesondheidsdienste, berading en ander ondersteuningsdienste in die voorkoming en behandeling van MIV/VIGS gevalle;

8.2.5 om leerders te onderrig hoe om teenoor persone met MIV/VIGS op te tree;

8.2.6 kweek en ontwikkeling van 'n kultuur van nie-diskriminasie teenoor persone met MIV/VIGS; en

8.2.7 verskaf inligting oor gepaste voorkomingsmaatreëls, insluitend onthouding van geslagtelike omgang, die gebruik van kondome en die toepassing van die universele voorkomingsmaatreëls.

8.3 Onderrig en inligting oor MIV/VIGS moet akkuraat en wetenskaplik korrek wees in 'n taal en in terme wat die leerders op hulle ouderdom verstaan.

8.4 Die skool behoort ouers van leerders in te lig oor MIV/VIGS. Hulle moet ook die skool se hantering van MIV/VIGS verstaan en bekend wees met die waardes wat die skool aan die leerders verkondig. Ouers moet ook genooi word om deel te neem aan ouerbegeleidings besprekingsgroepe en moet bewus gemaak word van die rol wat die opvoeder speel in die voorkoming van MIV/VIGS.

## **9. PLIGTE EN VERANTWOORDELIKHEDE VAN LEERDERS, OPVOEDERS EN OUERS**

9.1 Alle leerders en opvoeders moet die regte van ander leerders en opvoeders respekteer.

9.2 Die "Gedragkode vir Leerders" wat by die skool aanvaar is behoort ook 'n klousule te bevat waarin die onaanvaarbaarheid van gedrag beskryf word wat die risiko van MIV/VIGS oordrag inhou.



9.3 Die finale verantwoordelikheid vir 'n leerder se gedrag lê by die leerder se ouers. Ouers van alle leerders:

9.3.1 moet sorg dat hulle kinders alle reëls gehoorsaam wat die oordrag van MIV/VIGS kan voorkom; en

9.3.2 word aangemoedig om 'n lewendige belangstelling te toon in sake rakende die voorkoming van MIV/VIGS

9.4 Dit word aanbeveel dat 'n leerder of opvoeder wat MIV positief is mediese advies moet inwin om te bepaal of die persoon se siektetoestand enige wesenlike gevaar vir die ander leerders en opvoeders by die skool inhou. As die hoof bepaal, aan die hand van mediese inligting, dat so 'n persoon se gesondheidstoestand wel medies gesproke 'n gesondheidsrisiko inhou vir die ander leerders en opvoeders van die skool, moet die hoof die beheerliggaamvoorsitter oor die saak inlig. Nadat die hoof met die beheerliggaam gekonsulteer het moet die nodige stappe gedoen word om die veiligheid van die ander leerders en opvoeders te verseker.

9.5 Opvoeders het die besondere verantwoordelikheid om te verseker dat die regte en waardigheid van alle leerders en opvoeders gerespekteer en beskerm word.

## **10. WEIERING OM KLAS BY TE WOON SAAM MET 'N MIV POSITIEWE PERSOON/ 'N LEERDER TE ONDERRIG WAT MIV POSITIEF IS OF SAAM MET 'N KOLLEGA TE WERK WAT MIV POSITIEF GETOETS IS**

10.1 'n Persoon wat weier om saam met 'n ander persoon skool te gaan/te werk omdat die persoon moontlik MIV/VIGS onder lede het of werklik MIV positief getoets is, moet reggehelp word oor die ware feite van MIV/VIGS. Alle leerders, hulle ouers en opvoeders behoort onderrig te word om die ware feite rondom MIV/VIGS te verstaan en te ken.

10.2 Leerders en opvoeders wat weier om saam met 'n MIV/VIGS persoon te leer of te werk behoort berading te ontvang.

10.3 Die hoof moet die situasie, saam met die opvoeder en/of leerder wat betrokke is aan die hand van die beginsels wat in dié beleidsdokument vervat is, oplos.

## **11. SKOOL EN BELEIDSTRUKTURE NA BO**

11.1 Die nasionale MIV/VIGS beleid stel die basiese beginsels oor MIV/VIGS.

11.2 In terme van sy funksie onder die Suid-Afrikaanse Skolewet 1996 (no 84 van 1996), die verdere Onderrig en Opleidingswet 1998 (No 98 van 1998), of enige ander toepaslike provinsiale ordonnansie, behoort die beheerliggaam van die skool sy eie beleidsdokument te ontwikkel oor MIV/VIGS om uitvoer te gee aan die nasionale beleid hieroor. Die skool se beleid mag nie afwyk van die beginsels wat in die nasionale beleid vervat is nie. Hierdie beleid is dus derhalwe opgestel om uitvoering te gee aan die Nasionale beleid.

## 12. GESONDHEIDSADVIESKOMITEE

12.1 'n Gesondheidsadvieskomitee behoort onder die beheerliggaam te funksioneer. Die komitee kan aanbevelings aan die beheerliggaam maak oor MIV/VIGS verwante sake.


12.2 Die Gesondheidsadvieskomitee behoort te bestaan uit leerders, ouers, opvoeders, mediese kenners en gesondheidswerkers.


12.3 Die skoolhoof en of sy gedelegeerde sal verantwoordelik wees vir die implementering van die MIV-beleid by die skool.

### Wysigings

Die skoolbeheerliggaam kan hierdie beleid van tyd tot tyd wysig, aanvul, verander of aanpas en is ook van toepassing op sosiale media.

AANVAAR EN GETEKEN TE Hs Swantland OP HIERDIE 9<sup>e</sup> DAG  
VAN Januarie 2019.

  
\_\_\_\_\_  
Beheerliggaamvoorsitter

  
\_\_\_\_\_  
Skoolhoof